



Sabtu, 17 Pebruari 2024

Ogen : Job 29:24



Cirem erbahansa Ergiah-giah



Enggo nge kam lit cirem wari enda? Ula kita mapas kerna cirem, sabap cirem banci mereken semangat ras ukur ergiah-giah subuk man banta bage pe kalak si iciremi kita. Cirem e sada respon otak adi kalak sangana senang ras ermeriah ukur. Em sababna, tupung lit kalak cirem man banta, kita ikut senang amin pe kalak e la si tandai. Jadi, cirem e banci mereken ngaruh si mehuli ku sekelewetta.

Erlajar arah Jop, ituduhkenna kelenga atena alu cirem nandangi kalak si lit perbebenna. Nina Jop, adi ndele ate kalak, ku ciremi ia, janah ngidah ayongku siang ergiah-giah minter ukurna. Erbage alasen si erbahansa ate kalak ndele, banci pinakit si la erkedungen, banci jabu si la sada arih, banci ka anak si la megiken kata, banci pendahin si la mereken kecukupen, banci ka sangkep geluh si la bagi ukur ras sidebanna. Uga nge ayo kalak si lit i bas ndele ate?

Arah pengakun Jop, la ia terpengaruh man kalak si isekelewetna, la ia ikut erndele ate, tapi ipegegehina si erndele ate e arah ciremna. Cirem e banci itularken. Tupung Jop cirem man temanna si erndele ate e, temanna e banci ngusih ciremna, e maka teridah dungna siang ayona ras erbahan ukur ergiah-giah. Cirem e banci ngubahken suasana pusuh ras otak.

Tuhu lit nge lalap perbebenta ras sekelewetta. Arah cirem saja entah labo ndungi persoalen. Tapi arah cirem banci mabai sekalak jelma rukur positif man dirina, em sinampati ukurna teneng ngalaken persoalen geluh. Turah pengarapen, lit denga si mehuli wari si pepagi si erbahansa ergiah-giah ukurna. Cirem pe nambahi kesehaten kulanta. Teman Moria, tersampat kal kulanta ras kalak si deban adi kita cirem.